



Selasa 12 Juli 2022

Esekiel 44:1-3



“Kerabangen Si Ibentasi Tuhan ”



Kenca ibegiken Esekiel pengajaren Tuhan man bana i bas pengenehenna e, ibaba malaikat Tuhan ka Esekiel ku darat rumah pertoton, e me kerabangen si arah darat. I je ngerana ka Tuhan man Esekiel. Kerabangen e tetap ikunci, ise pe la banci mentas arah je sabap Tuhan si isembah kalak Israel enggo mentas arah je. Kerabangen si arah darat e arus badia, la banci sembarangen jelma mentas arah e. Manusia situhuna labo badia, perukuren ras perbahanenna megati labo bagi siisuraken Dibata. Lagu langkahna meluat, melala si erbahansa manusia e nilah i bas dalam Dibata nari.

Si idah i je maka Dalam si ibentasi Dibata pe lanai banci ibentasi manusia. Dalam e enggo ihususken jadi dalam Dibata. Tapi Tuhan mereken sada kesempatan man raja si paksana erkuasa entah memerintah tupun e. Raja e banci lawes ku lorong kerabangen e man pangan si badia i adap-adapenKu. Raja e banci bengket ras lawes nadingken lorong kerabangen e arah ruang si mbelin si lit i je.

Pengenehenen Esekiel e mereken sada pengajaren man banta maka dalam si enggo ibentasi Dibata arus ijaga gelah tetap badia. La kal ate Dibata iliami dalam si enggo pernah ibentasina. E maka nina kerabangen e arus ikunci. Bagi Dibata badia, dalam-dalam si ibentasiNa pe arus tetap badia. La kal nggit Dibata e singgur ras kalak perdosa. DalamNa pe la banci ipebali ras dalam manusia. Tapi si idah maka Dibata mereken kesempatan man Raja si erkuasa lako banci bengket arah lorong kerabangen e, nuduhkensa maka lit denga perkuah ate Dibata man raja ras man bangsaNa. Lit denga kesempatan man pangan si badia, janah lit denga kesempatan banci jumpa ras Dibata. Labo ban beluhna manusia entah metunggunng kin manusia e, tapi Dibata si mpetunggunngkensa. Nggit denga ia ngaloken manusia e. Labo rasa lalap kita itulakNa. Mbelin kepe perkuah ate Dibata e man manusia e.

Penanam-nanam keleng ate Tuhan e.



Blank writing area with a wavy top edge.